

ILUARSISSUTIT

Siullermeerinnineq aappassaaneerinninnermilu saqqummiussissut 22. september 2016-imersoq taarserneqarpoq siullermeerinninninngorlugu.

Inatsisartut ataatsimiittarfissaannik, allaffissornikkut sullissiviit ilanngullugit, nutaa-mik sananissamik 2013-imi novembarimi tunngaviusumik isummernerup Inatsisartunit ilalerneqarnissaanik Inatsisartut aalajangiiffigisassaattut siunnersuut.

(Suleriaatsimut Ataatsimiititaliaq)

Saqqummiussissut

(Inatsisartut Siulittaasuat)

Siullermeerinnineq

2016-imi upernaakkut ataatsimiinnermi, 2013-imi nutaamik Inatsisartoqarfiliornissamik tunngaviusumik aalajangerneq, taamanikkut amerlanerussuteqartunit ilaasortanit 24-init akuerineqartoq, eqqarsaatigalugu suliassap siunissaata inaarutaasumik aalajangiivigineqarnissaata Inatsisartunut tamarmiusunut aalajangiivigisassanngortinneqarnissaa Suleriaatsimut Ataatsimiititaliap oqaluuseraa.

Suliassamut atatillugu ullumikkut pissutsit imaapput sanaartugassanut aningaasaateqarfimmi suliniutip pilersaarusiorneqarnissaanut aningaasaliissutit suli uninngammata, taamaattumillu ataatsimiititaliap nalilerlugu Inatsisartoqarfissamik nutaamik sananissamut pilersaarusiornermut aningaasaliissutit attatiinnarneqassanersut peerneqassanersulluunniit Inatsisartunit tamarmiusunit isummerfigineqartariaqartoq.

Tamatumunnga atatillugu oqaatigineqassaaq Suleriaatsimut Ataatsimiititaliaq suliassami avissimammata, taamaattumillu aamma ataatsimiititaliami amerlanerussuteqartut, Siumut Inuit Ataqatigiillu, tassaammata suliassap Inatsisartunut saqqummiunneqarnissaanik aalajangiisimasut.

2013-imi ukiakkut ataatsimiinnermi Inatsisartut aalajangerput inatsisartoqarfissamik nutaamik sananissap pilersaarusiorneqarnissaanut Siulittaasoqarfik piginnaatinneqassasoq, tamatumunnga atatillugu siunnersuummut suliassatigut aningaasatigullu killiliussat iluanni taamatut sanaartornissamut pisariaqartunik isumaqatigiissuteqarsinnaanissaanut.

2013-imi siunnersuummik Inatsisartut suliarinninnerat ilaliinerallu sioqqullugu suliassaq pil-lugu aalajangiinissamut paasissutissatullu atortussanik sukumiisumik suliarineqarsimasunik saqqummiisoqarpoq, soorlu aamma suliassaq Suleriaatsimut Ataatsimiititaliami sukumiisumik suliarineqarsimasoq.

Nutaamik Inatsisartoqarfiliornissaq pillugu sukumiisunik nalunaarusiortoqartareerpoq, soorlu aamma suliniut sulii Sanaartugassanut Iluarsagassanullu Aningaasaateqarfimmi inissisimasoq. Sanaartorfissamik aalajangersimasumik sulii nassaartoqanngilaq, siulittaasoqarfilli sanaartorfiusinnaasumik nutaamik ujarlerneq ingerlateqqissappagu suliniutip siunissaa pillugu Inatsisartut erseqqissumik aalajangernissaat pisariaqarpoq.

Suleriaatsimut Ataatsimiititaliap nalunngilaa tamatumani partiit tamarmik naalackersuinikkut akunnattoorfeqarsinnaammata. Tamattali isumaqatigiissutigisinnaagunarparput Inatsisartuni sulinermut avatangiisitigut atugassarititaasut ullutsinnut naleqqukkunnaarsimmata, nutarterisoqartillugu oqartoqarsinnaalluni iikkat nuuginnarneqartartut tunngaviusumik pissutsit iluarsisariaqartut allanngortinnagit. Aamma avaqunneqarsinnaanngilaq Inatsisartut piujuartussaammata. Inatsisartut aamma ukiut 100-t qaangiuppata maaniissapput. Ullumikkut qinikkat kisiisa eqqarsaatiginagit siunissami qinigaasartussat aamma eqqarsaatigalugit Inatsisartoqarnerput nutartertuassagutsigu ineriartortittuassagutsigulu ullumikkut sulinermut killissarititaasut ineriartortinnissaannut sapiissuseqarlunilu piumassuseqartoqartariaqarpoq.

Sanaartukkap Nuummi Naalackersuisut allaffeqarfiinut illorsualiaasimasup sananeqarneranisut aningaasalersorneqarnissaa eqqarsaatigineqarpoq, tassa pisortat namminersortullu peqatigiinnerisigut BOT-mik (Build, Operate and Transfer – Sanaartoriarlugu, Ingerlateriarlugu Tunniullugu) taaneqartartumik. Taamaalilluni Illuut A/S tassaassaaq Inatsisartoqarfissap sananeqarnissanut pigisanik aalaakkaasunik qularnaveeqqusiussilluni taarsigassarsisussaq sanaartornermillu isumaginnittussaq, tamatumalu kingorna Inatsisartut sanaartugaq Illuut A/S-imit ukiuni 30-ni atorunnaarsinneqarsinnaanngitsumik attartussallugu.

Attartornermi taamaallaat akilerneqartassapput pigisanik aalaakkaasunik qularnaveeqqusiussilluni taarsigassarsianut akiliutinut tamatumunngalu atatillugu akissaajaatinut aningaasartuutit. Taamaalilluni Illuut A/S immikkut isertitaqartartussaassanngilaq. Inatsisartoqarfik ukiut 30-it qaangiuppata akeqanngitsumik Inatsisartunut tunniunneqassaaq. Taamaalilluni sanaartorneq 2017-imi IST-mut (tassa Ingerlatsinermit, Sanaartornermit Taarsigassarsisitsisarnermillu missingersuutinut) sunniuteqassanngilaq. Illuut A/S-ip pigisanik qularnaveeqqusiilluni taarsigassarsineranut atatillugu inuiaqatigiit ataatsimut isigalugit ilanngaattissat ilanngaatigereerlugit akiitsui sanaartornermit atatillugu taarsigassarsiat nalinginik annertuseriassapput.

Sanaartukkap atorneqalernerani attartornermit ingerlatsinernullu aningaasartuutit Aningaasanut inatsimmi konto pingaarneq 20.30.10 Illuutinik ingerlatsineq aserfallatsaaliuinerlu imaluunniit taamaaqataanik Inatsisartut suliaasaqarfiisa ataanni konto pingaarneq siunertamut pilersinneqarsimasoq aqqutigalugu aningaasartuutigineqartassapput. Sanaartukkamut 3.500 kvadratmeterinik annertutigisumut ukiumut attartornermit aningaasartuutit 10,5 mio. kr. aamma 12,5 mio. kr. akornanniinnissaat naatsorsuutigineqarpoq, sanaartorneranut aki, atortulersuutit, pequtsersuutit il.il. apequtaallutik. Suliniummut atatillugu ilanngaattissat ilanngaatigereerlugit ukiumut ingerlatsinermit aningaasartuutinut apequtaassaaq illorsuaq ullumikkut Inatsisartunit atorneqartoq Inatsisartoqarfittaaq atuleriarpas qanoq pineqassanersoq.

Taamaalilluni aningaasalersueriaatsikkut siunnersuutigineqartukut siunissami qinigaasartussat sullivissaannik sanaartorneq, suliniutinit allanit pisortanit aningaasalersorneqartunit aningaasaliissutinik tigusingikkaluarluni ingerlanneqassaaq.

Suliniut atorfissaqartinneqarpoq pisariaqartinneqarluni, tamanut iluaqutaasunik nuannaarutaasumillu siunissami qinigaasartussat suliffissaqarnissaat qularnaarneqassappat.

Naggataatigut ilanngussat ilanngunneqartut innersuussutigissavakka.

Taamatut oqaaseqarlunga siunnersuut Inatsisartunut oqaluuserisassanngortippara.